

Sedischavla radunonza generala dil

Forum cultural Tujetsch

Venderdis, ils 31 da schaner 2014, allas 20.00 uras en sala pintga, casa da scola, Sedrun

Protocol

1. Beinvegni e presenza

President Andre Schmid beneventa ils 7 presents alla sedischavla radunonza dil FcT. Specialmein beneventa el president communal Pancrazi Berther. Perstgisai ein: geraua Eveline Soliva e Seppa Schmet.

2. Elecziun d'in dumbravuschs

Sco dumbravuschs vegn Gion Giachen Monn, Rueras, eligius.

3. Prelecziun ed approbaziun dil protocol dalla radunonza generala dils 30 da november 2012

Il protocol dils 30 da november 2012 vegn prelegius. Norbert Berther fa la remarca che siu votum digl onn vargau, ch'il FcT dueigi patertgar dad era esser ina plattafuorma e possibilitar il presentar lavurs da diplom, da matura ed auter, seigi buca menziunau el protocol. Cun la risposta che la remarca vegni publicada en quest liug, vegn il protocol approbaus unanimamein. President Andre Schmid admetta in sincer engraziament al nuder dil FcT.

4. Rapport annual 2012/13

En siu rapport presidial menziunescha il president entginas activitads succedidas el decuors digl onn da lavur dil FcT.

Museum La Truaisch – exposiziun da fotografias da Teofil Schmid

En collaboraziun cul Museum La Truaisch ei l'exposiziun da fotos da Teofil Schmid succedida durant gl'entir onn 2013 e cuoza aunc entochen Pastgas 2014. Cun la donaziun da ver 2500 fotos entras ils descendents da Teofil Schmid agl Archiv communal da Tujetsch, ha la vischnaunca retschert in grondius schenghetg ed ina unica documentaziun fotografica dils onns 1940 – 1960.

Giuw – baghetg dalla Pleiv Tujetsch

Dapi igl onn 2008 sefatschenta il FcT cun l'ucliva da Giuv. Per mantener aunc bufatget il caracter d'in anteriur uclaun ei il FcT sestentaus per la cuvrida dil baghetg dalla pleiv cun slondas. El decuors dalla stad 2013 ei la lavur succedida ed il baghetg fa ussa ina stupenta pareta da fiasta en vestgiu da slondas. El ha gia giu la honur d'embellir il novissim prospect da Sedrun Disentis Turissem. La pleiv vegn proximamein a sanar ils mirs dil baghetg. Il FcT intenda d'animar da cuvierer ulteriurs baghetgs e faners cun slondas.

Milarit

Igl onn 2000 ha Conrad Berther, Rueras anflau „il“ Milarit. Actualmein sepresenta el sco „star“ el Museum La Truaisch. El decuors dalla primavera digl onn 2013 ei vegniu creau aposta ina brochura per presentar detagliadamein il Milarit. L'entschatta dalla stad ein pliras instituziuns, firmas, fatschentas e privats vegni contactai cun ina brev cun la damonda da sustegn finanziel. Museum La Truaisch e FcT ein fermamein dil meini ch'il Milarit s'audi ella val, ella partiziuon da mineralias dil museum. Il Milarit ei absolutamein in scazi, in mineral cun cumparsa unica en sia bellezza e grondezia.

Casti da Putnengia

Uonn han las lavurs stuii ruassar muort il manco da finanzas. Sulettamein ina activitad ha giu liug e quei ina uatga cun pliras persunas responsablas per la sanaziun dil casti. El decuors da quella ein las davosas lavurs vegnidadas discussionadas. Legreivlamein ei il casti vegnius prius si egl inventari dils castials grischuns. Grazia a quella caussa savein nus retscheiver dapli sustegn finanziel. Plinavon ei vegniu discussionau davart il project ella vischinonza dil casti e l'integraziun da quel. L'idea dalla tuor panoramica vegn sustenida dils organs cantunals. La tuor duei documentar historia dalla val, dil casti e presentar da sum anora la geografia dalla val.

5. Rendaquen, rapport dalla revisura ed approvaziun dil quen

Il quen vegn presentaus da nies cassier Tumaisch Valier. En ses plaids introductivs fa el attents sin la situaziun actuala dil FcT. Las finanzas seigien plitost fleivlas en vesta dalla terminaziun dalla sanaziun dil casti da Putnengia. Cun la ferma speranza sin sustegn davart da nos commembers e commembras presenta el las cefras actualas.

Survesta quen ordinari:

Entradas	9'366.25
Expensas	7'216.20
Fatg anavos 2012/13	2'150.05
Bilanza:	
Saldo dils 01-11-2012	1'909.85
Saldo dils 01-11-2013	4'059.90
Fatg anavon 2012/13	2'150.05

Survesta dil conto casti da Putnengia:

Entradas (2003 - 2013)	179'753.25
Expensas	172'551.95
Saldo per ils 1-11-2013	7'201.30
Bilanza:	
Saldo dils 01-11-2012	304.20
Saldo dils 01-11-2013	7'505.50
Fatg anavon 2012/13	7'201.30

La revisura da quen, dunna Barla Monega, ei deplorablamein buca presenta e quei ord motiv d'ina grippa. Ensemen cul cassier ha ella repassau il quen ed anflau in quen menaus en uorden e cun las necessarias quittanzas e mussaments. Senza il rapport dalla revisura, che vegn pli tard mess denter ils documents dil FcT, vegn il quen acceptaus unanimamein cun dar scarica all'entira suprastonza.

6. Contribuziun annuala

Sin proposta dalla suprastonza dil Forum vegn la contribuziun annuala laschada sco tochen dacheu.

7. Elecziuns

Suenter dus onns en uffeci crodan las elecziuns dall'entira suprastonza e revisur/a. Damai che l'entira suprastonza stat vinavon a disposziun succeda quella tractanda ton pli spert e tuts vegnan reelegi cun in ferm applaus. La revisura Barla Monego-Venzin ha abdicau. Dapi igl onn 2004 ha ella funcziunau sco revisura dil FcT. Per sia lavur ed engaschi pil FcT, ed insumma per la cultura tuatschina, vegn engraziu ad ella cun in bi applaus. Sco niev revisur vegn Gion Giachen Monn da Rueras elegius. Cordiala gratulaziun e plascher!

8. Projects 2014

President André Schmid presenta il program da lavur pigl onn 2014.

Putnengia e punt Sumsassi

Dapi 1999 sefatschenta il FcT cul casti da Putnengia. Ussa ei ina terminaziun dalla sanaziun veseivla. Pon las finanzas – sche succeda cun 2014 la davosa etappa cun la sanaziun dils mirs egl ost ed ils mirs el funs digl intern dalla tuor. Ina sempla punt duei survir sco passadi el casti. L'attracziun dil casti duei vegnir cuntunschida cun ina tuor panoramica. Aschia duei la historia dil casti viver e palesar als vistaders e visitadras dil temps vargau. Cun l'integrasiun dil casti el project

Punt Sumsassi e senda da detgas da striegn, cugl accumpiganment d'ina stria, duei igl entir ambient dil casti daventar attractivs per nos hosps dalla val, oravontut per interessai per la historia e cultura, denton era per famiglias. El decuors digl onn 2014 succedan las preparativas per la realisaziun dil project. In broschura cun las purschidas dil project, l'intenziun e finamiras, duei sustener nus d'encurir las necessarias finanzas.

Museum La Truaisch

Il FcT ei vinavon presents ed activs el Museum La Truaisch cun l'exposiziun da fotos da Teofil Schmid che cuoza entochen Pastgas 2014. Silsuenter sustegn il FcT l'exposiziun 11 x 3 = 33, in'exposiziun che vegn realisada ensemen cun la scola da Tujetsch e che pren si'entschitta calonda fenadur.

Tablas d'informaziun

Uonn vul il FcT realisar ina da quellas sco model ed idea. Previu ei ina tabla informativa sil Plaz Cadruvi.

Tut ils projects basegnan finanzas. Tenor sco quellas sefan, vegnin nus da realisar ina ni l'autra caussa da nies program da lavur.

9. Varia

Norbert Berther, Zarcuns, fa la damonda pertuccont excursiuns culturalas. Quellas seigien bein sil program, mo vegnien buca realisadas. En sia risposta menziunescha il president ils problems da termins, mo ei dil meini da fixar ad uras ina cun indicar liug e finamira dall'excursiun previda.

Terminaziun

Dapi l'entschatta digl onn ha il FcT ina nova plattafuorma ella reit digitala, igl internet. Tarcisi Hendry presenta als presents la pagina cun far attents sin las numerusas caussas che vegnan publicadas, inaga sin la pagina dil FcT, mo era sin las ulteriras paginas ch'ei integradas, aschia davart la historia, la genealogia ed igl archiv dalla val. Plinavon ha era nies scribent Vic Hendry ina atgna plattafuorma. Il FcT ei bein in dils sulets forums cun ina tala vasta purschida. L'adressa secloma: www.forumcultural.ch. Las reacziuns ord il miez demuossan il plascher e l'admiraziun per la plattafuorma dil FcT.

A bunura sa il president serrar la radunonza cun engraziar per la participaziun e per la buna discussiun en favur dalla culturala.

Sedrun, ils 2 da fevrer 2014

Igl actuar: Tarcisi Hendry